

TE TOA TAKITINI

Te Utu mo te Pepa 10/- i te tau.

Me penei nga reta "*Te Toa Takitini*," Box 300, Hastings.

404

TE TOA TAKITINI.

Hune 1, 1926.

PIHOPA MO AOTEAROA.

HE RETA NA TE ATIPIHOPA O NUI TIRENI.

I TE putanga o te pepa o Mei tera tetahi korero nau na te Etita, he whakaatu i etahi ahuatanga o te Pihopatanga mo nga Maori, ara rawa ia mo te pakeha hei pihopa tuatahi. Tera pea etahi o nga Maori e pohehe, ka mutu i te pihopa tuatahi anake te pakeha, a ka tuturu he Maori anake nga pihopa i muri i a ia. He wehi noku kei pohehe te iwi Maori mo tenei take no reira he mea tika kia panuitia te ture (Canon) i paahitia e te Hinota Topu mo te whakatu pihopa mo te Pihopatanga o te iwi Maori.

E ki ana taua ture, ma te hinota Maori e whiriwhiri kia tokorima nga minita, kia tokorima nga mangai-reimana, hei hoa whiriwhiri mo nga pihopa o te Porowini o Nui Tirenī, i te mea kaore ano he pihopa mo nga Maori kia whakaingotia. Kua hei hoki iho i te hawhe o nga Pihopa kei Nui Tirenī nei i taua wa, e tae mai ki taua hui: a kua hoki hei hoki iho i te tokotoru minita me te tokotoru reimana o te hunga i whiriwhiria.

Ma te Atipihopa, a ki te ngaro atu ia, ma te Pihopa e whakaturia ana hei tiamana mo taua hui, e whakatakoto a-tuhituhi ki te aroaro o te komiti whiriwhiri, nga ingoa, kua hei neke atu i te toru. kua whakaaetia e te hui. Ma taua komiti whiriwhiri e whakaatu ki te Atipihopa te ingoa o te tangata kua rite i a ratou te kowhiri hei pihopa mo taua Pihopatanga.

Kua marama tatou kaore he whakaatu a te ture he aha te iwi o te pihopa tuatahi tae atu hoki ki nga pihopa a muri nei.

Ko taku whakaaro he mea pai kia tino marama tenei take kei raruraru tatou a muri nei.

Heoi na,

A. W. NUI TIRENI.

[Kia ora te Atipihopa mo te marama o tana whakaatu i te rarangi o te ture mo te pooti i te pihopa mo te iwi Maori, kei te marama kaore i whakahuatia me Maori me pakeha ranei taua tangata, ahakoa i te pihopa tuathi i nga pihopa ranei i muri atu. Otira no roto no nga korero whakamarama a koutou ko o hoa pihopa i Poneke. ka tono koutou me pakeha te tuatahi kia marama ai te whakatakoto i nga kaupapa, me to koutou whakaae me Maori i muri atu. He tika he korero noaiaho tera i puta noake i roto i a tatou whiriwhiri. Otira kei te tumanako matou. te wahanga ki te taha Maori o te Hahi. tera taua kupu e whakamana e koutou.—Na te Etita.]